


Conferencia Papiamento, idioma oficial dia 26 y 27 di october

ORANJESTAD - Fundacion Lanta Papiamento (Aruba) anfitrión di e aña aki tin e gran honor di invita tur amante di nos idioma Papiamento pa e conferencia "Papiamento, Idioma Oficial".

E otro miembronan di Plataforma Union di Papiamento, Fundacion Instituto Alsa Papiamentu (Coursou), Fundacion Akademia Papiamentu (Boneiro) y Fundacion SP-LIKA (Hulanda) cu conhuntamente cu FLP a contribui na e organisacion di e conferencia lo ta presente na e conferencia diabierna dia 26 y diasabra dia 27 di october na Biblioteca Nacional Aruba.

E conferencia ta pa celebra e echo cu 15 aña pasa Papiamento a bira idioma oficial y esaki ta e motibo principal pa organisa e conferencia pa duna honor na nos idioma den e "Aña di Papiamento 2018".

E metanan di e conferencia aki ta entre otro: duna mas tanto informacion posibel tocante e desaroyonan relaciona cu Papiamento, scol



multilingual y su balor, e posicion di Papiamento den enseñansa y comunidad, e relacion entre e islanan ABC encuan to Papiamento, e ley di oficialisacion di idioma, desaroyo di un Union di Idioma Papiamento. Y tambe lo atende e aspecto innovativo 'digitalisacion'.

Lo tin suficiente oportunidad pa esunnan presente discuti y intercambia di idea.

Minister di Enseñansa, Ciencia y Desaroyo Sostenibel Dr. A. Lampe lo habri e conferencia y lo papia tambe tocante e acuerdo cu el a cera cu minister di Enseñansa Ciencia, Cultura y Deporte di Coursou Drs. M. Alcalá-Wallé. Wladimir Kleinmoedig ta representa minister Alcalá-Wallé durante e conferencia. Señor E. Cecilia, diputado di Enseñansa di Boneiro tambe lo ta

presente y lo hiba palabra. Y ta mas cu claro cu nos minister di Cultura, señora Ruiz-Maduro tambe lo t'ey pa hiba palabra.

E oradornan/facilitadonan ta: Audrey Tromp-Wouters, Régine Croes, Merlynne Williams, Eduard Pieters, Ramon Todd Dandaré, Pedro Velásquez, Evelyn Ruiz-Croes, Joyce Pereira, Sergio Tromp (Aru-

ba), Marta Dijkhoff, Ace Suarez, Manuel Ortega (Coursou), Elsmarie Beukenboom, Sedney Marten (Boneiro), Ruben Severina, Fred D de Haas (Hulanda).

Lo pidi di e participante un contribucion pa por cubri e gastonan: diabierna entrada ta AWG. 15,-=, y diasabra AWG. 25,-=. Pa estudiante di IPA, UA, EPI, MAVO/HAVO/VWO tin un prijs special, esta AWG. 20,-=, pa henter e conferencia.

E personanan cu sigui henter e conferencia ta ricibi un certificado di participacion. Diasabra e cantina The Healthy Way di BNA ta ofrece un lunch di AWG.10,-=. Por scoge entre bami di galina of un plato vegetariano.

Idioma di conferencia ta Papiamento, pero tur hende ta liber di uza un otro idioma si ta necesario.

Pa mas informacion por yama telephone. 567-4677 of manda un e-mail na joycepereira@setarnet.aw. Por inscribi via e pagina di Facebook di Fundacion Lanta Papiamento.